

四庫全書

史部

欽定四庫全書

史部

五代會要卷十二至十七

詳摺官起居注事臣顧宗泰

編修臣程嘉謨覆勘

總校官編修臣王燕緒

校對官主事臣陳文樞

謄錄監生臣張鈺

欽定四庫全書

五代會要卷十二

宋 王溥 撰

寺

後唐天成元年十一月勅應今日已前修葺得寺院無  
令毀廢自此後不得輒有建造如有願在僧門亦宜准  
佛法格例官壇受戒不得衷私剃度

三年六月七日勅應天下太寺及勅賜名額院宇兼有

功德堂殿樓閣已成就者各勒住持其餘小小占射或舍施及置買目下屋宇雖多未有佛像者並須量事估價一時任公私收買其住持僧便委功德使及隨處長吏均配於大寺安止如院在僻靜之處舍宇無多不堪人承買者便仰毀拆其材木給付本僧田地任人請射仍限勅到後十日內並須通勘騰併了絕如敢遷延及有故違其所犯僧徒二年尼杖七十並勒還俗若有形勢借庇當移不移誑惑官中更求院額既達聽聞所

之人不係官位高低並行朝典如要增修福利則任於  
合留寺院內興功

晉天福四年十二月勅今後諸道州府城郭村坊不得  
創造寺宇所有自前蓋者聽依舊住持

開運二年七月左諫議大夫李元龜奏天下寺宇房屋  
近日多開元住僧轉與相典貼伏乞明行止絕從之  
周顯德二年五月六日勅條流僧尼畫一如後

一諸道州府縣鎮村坊應有勅額者一切仍舊其無勅

額者並仰停廢所有功德神像及僧尼與限一月騰併於逐處州軍縣鎮合留寺院內安置所有殿堂屋宇仰封鎖收管所有資財衣鉢斛斗孳畜什物並仰分付本主一天下諸縣城郭內若無勅額寺院只於停廢寺院內選功德屋宇最多者或寺或院僧尼各留一所若無尼處只留僧寺院一所其在軍鎮及偏鎮坊郭戶及二百戶已上者亦依諸縣例指揮所違邊遠郡無勅額寺院處於停廢寺院內僧尼各留兩所

一兩京諸道州府除見留寺院外今後不限城郭村坊山林勝境古迹之地並不得創造寺院蘭若如有僧尼俗士輒違勅命者其主首及同勾當人並徒三年仍配役其僧尼勒還族本州府錄事叅軍本判官本縣令佐並除名配流地分廂鎮職員所由當並嚴斷長吏奏請進止

一王公戚里諸道節刺已上今後不得奏請創造寺院及請開置戒壇如違仰御史臺彈奏四年九月賜京城

內新修四寺額以天清顯靜顯寧聖壽爲名

燃燈

梁開平三年正月勅兵革方偃久廢燃燈屬在上春務達陽氣宜於正月上元前後三晝夜開坊市門一任公私燃燈祈福

周廣順三年七月京城民晁諸殷等爲永壽節請各於門首齋僧燃燈三晝夜從之

雜錄



後唐天成元年十月十一日勅上國兩街僧道自前賜師號不數人而已至於賜紫並係特恩近日諸道州府因應聖節表薦僧道頗多宜令中書門下此後凡有諸處不係應聖節及橫薦僧道不得等閒申發章表請行命服師號切思正統二年六月七日勅應條流三京諸道州府縣鎮寺院僧尼事一訪聞近日僧尼等或因援請託以參尋既往來以爲常致奸訛之有倖自此後如有官中齋會行香顯有告援及大段齋供請命即行依

時赴會除此外不計齋前齋後僧尼不得輒有相過如  
敢故違仰逐處坊界所由及巡司節級畫時擒捉並准  
姦匪例處斷其所犯人衣物資財便充捉事人優賞如  
有人上告不虛准此酬賞

一此後如有修補寺宇功德要開講求化須至斷屠之  
日方得於大寺院開啟仍許每寺只開一坐兼不得僧  
於尼寺內開講尼亦不得將功德事請僧於諸寺開講  
如敢故違法師兼功德至僧徒三年尼並逐出城其坊

界及諸營士女不因三場齋月俗講亦不得過僧舍如公然通同許捉獲所犯人並加極法今後僧不因道場及齋會不得公然於俗舍安下住止如違准上科斷

一訪聞僧尼寺院多有故違條法衷私度人此後有志願出家准舊例經官陳狀比試所念經文則容剃削仍不因官壇不得私受戒法如違所犯僧及本師等各徒二年配於重處色役如是尼女及年老者杖之勒還俗若有童子出家亦須顯有分據

一訪聞近日有矯偽之徒依憑佛教誑誘人情或傷割形骸或負擔鉗索或書經於都肆或賣藥於街衢悉是乖訛須行斷絕此後如有此色之人並委所在街坊巡司糾察准上決配

一此後應是僧尼不計高低於街衢逢見呵殿官寮並須迴避如有故意違犯者便可收送法司若在身有章服師號者便委長吏舉奏當行剝奪如無章服者仰所在擯逐出城若有房院便許別人請射

一州城之內村落之中或有多慕邪宗妄稱聖教或僧  
尼不辨或男女混居合黨連羣夜聚明散託宣傳於法  
會潛縱恣於淫風若不却除實爲弊惡此後委所在州  
府縣鎮及地界所由司節級嚴加搜刺有此色人便仰  
收捉勘實開連黨徒並決重杖處死右宜徧降勅三  
京諸道州府長吏分明曉示逐處管界各令遵守

清泰二年三月兩街功德使奏每年誕聖節諸道州府  
奏薦僧尼紫衣師號今欲量立條試講論科試講經表

白各三科文章應制十三科持念一科禪科聲讚科並  
於本技能中條貫從之

晉天福二年十二月二日勅節文祠部奏請不置官壇  
剃度但於皇帝降聖之辰即於本住處州府陳狀便比  
試本業勘詳事行不虛則容剃削及取本鄉里五人已  
上耆宿保明文狀具言已前實是良善兼須結罪如爲  
僧之後別行惡事即罪甘連坐如是外來百姓不得輒  
有容許候剃訖仍具鄉貫姓號申祠部請告牒者當司

欲依前勅再舉條流如此後遇皇帝降聖之辰即於逐州府投狀剃落仍驗所習經業不虛即具出家因依本居鄉里俗姓法名年幾申省請給告牒始永爲公據若有不遵條理衷私剃度者便委逐州府本判官追收勘責事由不虛其新剃度之人並請重行決斷發遣歸本鄉里收管色役其元招引師生及保人等先具勘責違犯條流愆罪亦請痛行決斷常住所在仍具流號寺院因由申省如是州府不遵勅命衷私剃度不申請祠部

告牒其原行官吏請行朝典奉勅宜依

周廣順二年四月勅永壽節每年諸道節度防禦團練使刺史奏薦僧尼道士紫衣師號今後見任帶使相共奏二人見任防禦團練刺史只許奏一人在朝文武臣寮及前任官今後更不得奏薦

顯德二年五月六日勅條流僧尼畫一如後

一今後僧尼不得私剃頭應有人志願出家者並許父母祖父母處分已孤者取同居伯叔兄處分候聽許得



出家其師生須得本人家長聽許文字得容受男十五已上念得經文一百紙或讀得經文三百紙方得經本州陳狀乞剃頭委錄事叅軍本判官試驗經文合勅條者只仰聞奏其來剃頭間留髮髻如有私剃頭者却勒還俗其本師主徒三年勒還俗役三年其本寺院三綱知事僧尼杖八十並勒還俗

一僧尼今後不得私受戒只於兩京大名府京兆府青州府戒壇候受戒時兩京委祠部差官引試前項所習經

業其大名府等三處戒壇只委本判官錄事叅軍引試  
合勅條者分析聞奏如有私受戒者其本人本師主臨  
壇三綱知事僧尼並同私剃頭例科罪如引試經業  
不精輒與剃頭受戒者本試官當行朝典一應合剃頭  
受戒人等仰逐處於天清節一月前具姓名鄉貫寺院  
年幾及所習經業申奏候勅下委祠部給付憑由方得  
剃頭受戒不得非時施行起今後應有僧尼剃頭受戒無  
祠部憑由者所由並還俗

一應男子有父母祖父母在別無兒侍養不聽出家  
如違其本師主重行科斷

一應曾有犯遭官司刑責之人及棄背祖父母父母逃  
亡如奴婢姦人細作惡逆徒黨山林亡命未獲賊徒負  
罪潛竄人等並不得出家剃頭如有寺院輒容受者其  
本人及師主三綱知事僧尼鄰房同住僧仰收捉禁勘  
申奏取裁其地方巡司官吏不能覺察者仰暨申奏  
一自前多有逃遁軍人投寺院出家在所僧徒不畏官

方便與剝削起今後有向曾在軍門面帶瑕痕逐處寺院輒敢容受者其本人及師主三綱知事鄰房同住僧等仰密切收捉禁勘申奏地方官所由不能覺察重行科斷

一應有僧尼衷私叛置院舍私與人剃頭受戒及容賊盜惡逆徒黨姦細背軍之人輒披剃者其僧俗中有能告官及地方分所由節級自收捉到者以本犯僧尼衣鉢貲財給充優賞

一應有僧尼俗士自前多有捨身燒臂鍊指釘截手足帶鈴燃燈諸般毀壞肢體戲弄符篆左道妖惑之類今後一切止絕如此色人仰所在嚴斷遣配邊遠仍勒歸俗其所犯罪重者准格律處分所有居停寺院知事僧尼地方廂鎮職員所由公然容縱者重行科斷

一應有懷才抱器或武或文寄跡空門莫遂展志其中  
有願出仕宦者仰逐處長吏發遣赴闕少壯驍勇之人  
願在軍門者亦仰申奏必當量材錄用若僧尼中有情願

歸俗者一切聽許所在不得攪擾

觀

梁開平元年五月六日勅廢雍州太清宮改西都太微宮亳州太清宮皆爲觀諸道州紫極宮並爲老君廟

後唐同光元年十月西都太微宮亳州太清宮諸州紫極宮皆復本名

後唐天成四年十二月勅崇聖祖修飾道州旣復其名固難無額宜令所司依舊造上清宮牌額兼京城內金

真觀改為崇道宮亦准上給換牌額以上清宮久無牌額故也

雜錄

後唐同光元年十二月亳州太清宮奏聖祖玄元皇帝

殿枯檜再生枝葉畫圖以進

按賴卿記唐高祖神堯皇帝武德二年枯檜重華至

祿山僭號姜齊玄宗自蜀歸京枝葉復盛至是再生一枝長二尺餘

天成三年正月中書門下奏准假寧令玄元皇帝降聖

節依假三日據續會要准會昌元年二月勸休假一日

伏請准近勅從之

清泰二年三月兩准功德使奏每年聖誕節諸道州府  
奏薦道士紫衣師號今欲量立條試經法科試義十道  
講論科試經論文章應制試詩表白科試聲喉聲讚科  
試步虛三啟焚修科試齋醮從之

晉天福四年三月遣中書使趙處玘以板詔徵少華山  
隱士鄭雲叟玉笥山道士羅隱之為拾遺不至四月以  
雲叟為右諫議大夫隱之錫號命希夷先生雲叟稱疾



不起賜號逍遙先生仍給致仕官俸祿

金吾衛

後唐天成三年六月勅金吾每奏左右廂內並平安有類藩方宜改云軍國內外並平安

屯衛

周廣順二年十二月御史臺奏唐景雲二年改左右屯衛為威衛唐高宗名治改治書侍御史為御史中丞諸州治中為司馬蓋臣子避君父名也請諸衛中書舊是

屯衛者復舊名從之

京城諸軍

梁開平元年四月改左右長直為左右龍虎軍左右內  
衙為左右羽林軍左右堅銳夾馬突將為左右神武軍  
左右親隨軍將馬軍為左右龍驤軍其年九月置左右  
天興左右廣勝軍仍以親王為軍使

二年十月置左右神捷軍十二月改左右天武為左右  
龍虎軍左右龍虎為左右天武軍左右天威為左右羽

林軍左右羽林為左右天威軍左右英武為左右神武

軍左右神武為左右英武軍

前朝置龍虎六軍謂之衛士至是以天武神武英武

等六軍易其軍號而任勳舊焉

後唐長興三年三月勅應軍神威雄威及魏府廣捷以下指揮宜改為左右羽林置四十指揮每十指揮立為一軍置都指揮使一人兼分為左右廂應順元年三月改左右羽林四十指揮為嚴衛左右軍龍武神武四十指揮為奉聖左右軍

清泰元年六月改捧聖馬軍為彰聖左右軍嚴衛步軍  
為寧衛左右軍

晉天福六年七月改拱宸威和內直軍並為興順至八  
月改奉德兩軍為護聖左右軍

周廣順元年四月改侍衛馬軍曰龍捷左右軍步軍曰

虎捷左右軍

御撰  
其名

顯德元年十月上謂侍臣曰侍衛兵士累朝以來老少  
相半強懦不分蓋徇人情不能選練今春高平與劉崇

及蕃軍相遇臨敵有指使不前者苟非朕親當堅陣幾  
至喪敗况百戶農夫未能贍一甲士且兵在精不在衆宜  
令一一點選精銳者升在上軍怯懦者任從安便庶期

可用又不虛費

先是上按于高平觀其退縮慨然有懲革之意又以驍勇之士多為外諸侯所

占于是召募天下豪傑不以草澤為阻進于闕下躬親試閱選武藝超絕及有身首者分署為殿前諸班因有散員散指揮使內殿前直散都頭鐵騎控鶴之類

二年十二月改東西小卒為東西班承旨其月以新收  
復秦鳳州所擒獲川軍署為懷恩軍四年四月以先降

到江南兵士分為六軍共三十指揮賜號懷德軍

雜錄

後唐同光二年二月勅隨駕收復汴州並扈從到洛京  
南郊立仗都將官員自檢校司空以下宜並賜協謀定亂  
靖國功臣自檢校僕射尚書常侍至大夫中丞宜並賜忠  
勇拱衛功臣其初帶憲衛並賜忠烈功臣已有功臣名  
者不在此限其節級長行軍將並賜扈蹕功臣

唐玄宗  
平內難

賜衛士葛福順等為唐元功臣不過十數人德宗駐蹕  
奉天賜從駕立功將校為奉天定難功臣及僖宗西京

頻年播遷功臣差多至  
是徧及戎卒非賞典也

其年九月勅近聞蕃方入奏之人多於京內私買衣甲  
宜令總管司密加覺察

晉天福二年二月勅京及諸道馬步諸軍若長行違犯  
便委副將據罪處理如副將十將違犯即委本指揮使  
科斷指揮有罪若不出軍即委都指揮使具錄申奏若  
行營在外即委行營統領依軍法施行其諸道軍都在  
本處者即委本處節度使防禦團練使刺史據罪科斷

其年十月勅禁諸道不得擅造器甲開運元年二月命諸道州府點集鄉軍率以稅戶七家共出一卒兵仗器械共力營之至五月勅諸道新點鄉兵宜以武定為名至三年正月改武定為天威軍尋命放散其年十月勅作坊及諸道造作器械衣甲今後並不得用金銀裝飾

馬

梁開平四年十月頒奪馬令冒禁者罪之

先是梁師攻戰得敵人



馬必納官故出  
今命獲者有之

後唐同光三年六月下河南河北諸州和市戰馬官吏

除一匹外匿者坐罪

時將討蜀故也

長興元年七月分飛龍院為左右以小馬坊為右飛龍院

四年十月勅沿邊藩鎮或有藩部賣馬可擇其良壯給

券具數以聞

先是上問見管馬數樞密使范延光奏天下常交草粟者近五萬匹見今西北諸蕃

賣馬者往來如市其郵傳之費中估之直日四十五貫以臣計之國力十耗其七馬無所使財賦漸銷朝廷甚

非所利上善  
之乃降是勅

清泰三年十月勅諸道州府縣鎮賓佐至錄事參軍都  
押衙教練使以上各留馬一匹乘騎及鄉射士庶有馬  
者無問形勢馬不以牝牡皆抄借但勝衣甲並仰印記  
差人管押送納其小弱病患者即退字本道收管節度  
防禦團練等使刺史除自己馬外不得因便影占管軍  
都將除出軍及隨駕外見逐處屯駐者都指揮使舊有  
馬許留五匹小指揮使兩匹都頭一匹其餘凡五匹取

兩匹十匹取五匹更多者並依此例抽取在京文武百官主軍將校內諸司使以下隨駕職員舊有馬者任令隨意進納不得影占人私馬各下諸道准此

晉天福九年正月發使於諸道州府括取公私之馬時契

丹入寇上駐軍澶州以禦之故有是命

漢天福十二年九月詔天下州府和買戰馬

謚

德靖梁贈尚書令廣王金昱

文穆故天下兵馬都元帥吳越王錢元瓘

勅所司謚曰  
莊穆勅改謚

曰文

穆

文昭故天策上將軍湖南節度使守尚書令贈太師馬

希範

文懿贈尚書令瀛王馮道

文惠太子太保盧質

漢乾祐元年九月其子尚書兵  
部員外郎盧授上請謚故下太

常議謚

曰文惠

武穆故天策上將軍湖南節度使馬殷

武懿贈尚書令秦王高行周

武安贈太師康福

忠敬故秦王李茂正贈太傅馮行襲

忠肅贈太師王處存贈太師張全義

忠懿故福建節度使閩王王審知太師安元信

忠武贈太師晉國公霍彥威故成德軍節度使馬全節

忠正贈中書令鄭仁誨

忠憲贈中書令劉詞

恭靖贈尚書左僕射崔協

恭慧贈中書令李從敏

正懿贈尚書令羅紹威

正憲贈左武衛上將軍張承業

正惠贈太子少傅朱漢賓

太常博士林鼎議曰漢賓散  
已俸代逋欠缺荒俗儕富庶

所莅之地綽有政聲知進退存亡之理得善始善終之  
道謹按謚法中道不撓保節揚名曰正愛民好學寬裕

慈仁曰惠請謚

曰正惠從之

成穆贈侍中安元信

雜錄

漢乾祐二年十二月勅故荆南節度使高平王高從誨

宜令太常定謚

故事臣下請謚故吏陳行狀考功司覆奏下乃議謚今降勅之新例也

當直

梁開平四年二月勅其逐日當中書舍人及吏部兵部司勅知印郎官少府監及篆印文兼書寫告身人吏等並宜輪次於中書側近止宿

休假

後唐天成四年五月四日度支奏准勅中書門下奏朝  
臣時有乞假覲省者欲量賜茶藥奉勅宜依者切緣諸  
班官班省司不見品秩高低兼未則例難議施行各令  
據官品等第指揮文班左右常侍諫議給事舍人諸行  
尚書太子賓客諸寺太卿國子監祭酒詹事左右丞諸  
行侍郎宜各賜蜀茶三斤起居拾遺補闕侍御史殿中  
監察御史左右庶子諸寺少卿國子業司業河南少尹  
左右諭德諸行郎中員外郎太常博士宜各賜蜀茶二



斤蠟面茶一斤草豆穀百枝肉豆穀五十枝青木香一  
斤半國子博士五經博士兩縣令著作郎太常宗正殿  
中丞諸局奉御大理正太子中允洗馬左右贊善太子  
中舍司天五官正宜各賜蜀茶二斤蠟面茶一斤草豆  
穀五十枝肉豆穀五十枝青木香一斤

武班左右金吾上將軍左右諸衛上將軍宜各賜蜀茶  
三斤蠟面茶二斤草豆穀一百枝肉豆穀一百枝青木  
香二斤左右諸將大將軍左右諸衛將軍宜各賜蜀茶

二斤蠟面茶一斤草豆穀一百枝肉豆穀五十枝青木  
香一斤半左右率府副率宜各賜蜀茶二斤蠟面茶一  
斤草豆穀五十枝肉豆穀五十枝青木香一斤奉勅今  
後或有臣僚請假覲省其所賜藥候辭朝之日於閣門  
宣賜至晉天福二年九月度支奏朝臣請假覲省出入  
皆有支賜茶藥今緣諸庫無見在伏乞權罷從之至五  
年三月勅朝臣請假覲省依天成四年勅支賜茶藥晉  
天福二年十一月中書門下奏按六典尚書吏部凡職

事官應覲省及稱病不得過程謂身有疾病滿百日若所親疾病滿二百日及當侍解官申省以聞其應侍人材用灼然要藉驅使者得帶官侍食又准雜令諸外官授給裝束假去所授官一千里內者四十日二千里內者五十日三千里內者六十日四千里內者七十日過四千里八十日並除程其假內欲赴任者聽之若有事須早還者不用此令若京官身先在外者裝束假減外官之半勅准令典處分

醫術

後唐清泰三年三月翰林學士和凝奏天下諸屯駐兵士望令太醫署合傷寒時氣瘧痢等藥量事給付本軍主掌以給患病士卒之家百姓亦准醫疾令和合藥物拯貧民兼請依本朝故事諸道署藥博士合考尋醫方合和藥物以濟部人其御製廣濟廣利等方書亦請翰林醫官重校頒行天下勅所奏醫博士諸道合有軍醫許及諸道補署不在奏聞餘依所奏

欽定四庫全書

皇朝

五代會要

二十一

五代會要卷十二

欽定四庫全書

五代會要卷十三

宋 王溥 撰

中書門下

起請雜  
條附

梁開平五年二月勅食人之食者憂人之事況丞相尊  
位參決大政而堂封未給且無餐錢勝甚媿之宜令日  
食萬錢之半

乾化二年十月加宰相俸至二百千命豐德庫逐月以

見錢給之

後唐天成四年八月勅朝廷遇有將相恩命准往例諸道節度使帶平章事兼侍中中書令並列銜于勅牒後側書使字今兩浙節度使錢鏐是元帥尚父與使相名殊承前列銜久未改正湖南節度使馬殷先兼中書令之時理宜齒于相位今守太師尚書令是南省官資不合列署勅尾今後每署將相勅牒宜落下錢鏐馬殷官位仍永為常式

長興四年九月勅馬贊有經邦之茂業宜進位于公台



但緣平章事犯其父名不欲斥其家諱可改同平章事  
爲同中書門下二品

清泰元年五月宰臣劉昫奏中書以近勅祠祭行事官  
致齋內惟祀事得行其餘悉斷又宰臣行事致齋內不  
押班不赴內殿起居不知印臣緣判三司公事其祀事  
國忌行香伏乞特免從之

二年三月宰臣張延朗奏臣判三司事每日內殿祇候  
其合綴前班押班伏乞特免從之

晉天福四年八月勅皇圖草故庶政維新宜設規程以  
諧公共其中書知印祇委上位宰臣一員

五年二月升中書門下平章事爲正二品

其年三月勅中書門下五品以上官於兩省上事宰臣  
押角之禮宜廢之

起請雜錄

後唐同光二年五月中書門下奏凡有進狀乞官及應  
諸州府奏請判官薦舉前資自詣中書求官等所稱頭

銜多有逾越中書既無舊案除授何以爲憑起今後凡有諸色前資若合命官者除近曾任朝官及有科第歷清資官爲衆所知外並須進到前任告赤中書點檢方可進擬從之

長興元年五月中書門下奏今後凡是在京及諸州府判官得替一年後則得求官擢才特勅勿以爲例從之清泰二年八月中書門下上言前大卿監五品升朝官西班將軍皆在任許滿二十五月如銜替已經二十月

即別任用少卿監舊例三任四任方入大卿監五品三任四任方入少卿監今後並祇三任逐任須月限滿無殿責者使入此官西班牙將軍罷任一年許求官舊例三任四任方入大將軍今祇以三任爲限三任大將軍方入上將軍並須逐任滿月限無殿責或曾任金吾將軍街使藩鎮刺史特勅並不拘此例諸道除兩使判官外書記已下任自辟請應朝官除外任罷任後一年方許陳乞諸道賓席未曾升朝者若官兼三院御史即除

中下縣令若兼大夫中丞秘書少監郎中員外郎與清  
資初任升朝官檢校官至尚書常侍秘書監庶子升朝  
便與少卿監諸州防禦團練判官推官並請本州辟請  
中書不便除授應出選門官帶三院御史供奉裏行及  
省銜罷任後周年許陳乞諸州別駕不除令錄仍守本  
官月限替後一年許陳乞長史司馬因攝奏正比未有  
官者送名從之

三年五月勅近以內外臣僚出入迭處稍均勞逸免滯

轉遷應兩使判官畿赤令長取郎中員外郎補闕拾遺  
三丞五博並聽官僚選擇擢任一則俾藩方侯伯別耀  
賓階次則致朝列人臣備諳時政令後或偶缺員依此  
施行

晉天福二年正月勅令後應朝臣中有藉才特除外任  
者秩滿無遺闕將來擬官之時在外一任同在朝一任  
其陳乞外職及不是特勅不在此限

門下省

後唐天成元年九月二十五日門下中書兩省狀准舊  
例檢校官合納本省禮錢伏見尚書省檢校官禮錢近  
降勅命除翊衛勛庸藩垣將佐外其餘不帶平章事節  
度使及防禦團練刺史諸道副使郎中已下並三司職掌  
監院官縣令錄事參軍判官等凡關此例並可徵收者  
伏緣省司舊例別無錢物祇徵禮錢以充公廨破使蓋  
值離亂致失規繩節目縱有檢校官未奉勅命許令依  
舊徵理其檢校左右散騎常侍乞依尚書省除翊衛勛

庸藩垣將佐外並許徵收所異朝廷故事免失於根原  
省閭舊儀長存於規制謹具本朝元徵舊例錢數乞奏  
聞者中書約本省舊徵禮錢及蠲減錢數如左防禦團  
練刺史諸道郎官三司職掌檢校左右散騎常侍舊例  
各納錢一十五千今減外各納錢五千兩府及次府少  
尹左右司馬別駕長史舊例各納錢十千減外各納錢  
四千諸道將校舊例納錢五千減外各納錢三千都押衙  
至大將各納錢五千減外各納錢二千五百進奏官各



納錢二千其餘都頭指揮使已下並與免放右奉勅宜  
令門下中書兩省准此逐月具數申中書門下

長興元年十一月給事中崔衍奏當省給納諸州銅魚  
勘問本行令史將狀稱內庫每州銅魚一隻長留在內  
一隻在本州庫逐季申報平安左魚五隻皆鐫次第字  
號每新除刺史到郡後遣人到省請合左魚當司覆奏  
內庫次第出給左魚一隻到州集官吏取州庫右魚契  
合却差人送左魚納省如別除刺史班司又請次第左

魚周而復始臣以州司差人往來須有煩費今後所除刺史在京受命或經過都城者可令自牒當省請左魚本州契合後差人納省從之

周顯德六年三月勅諸道牧守每遇除移特降制書何假符契其請納銅魚宜廢之

晉天福七年五月詔應諸色進策人等皆抱才能方來贄獻宜加明試俾盡臧謀今後應進策中書奏覆勅下委門下省試策三道仍定上中下三等如元進策內有

施行者其所試策或上或中者委門下省給與減選或  
出身優牒合格選日其試策上者委銓司超一資注擬  
如所試策或上或中元進策內不曾施行所試策下元  
進策內曾有施行便仰曉示發遣不得再有投進餘准  
前後勅處分

中書省

後唐天成元年十二月二十三日中書奏伏准故事應  
諸道節度使凡帶平章事宜於中書都堂上事禮絕百

寮等威無異刊石紀壁以列姓名事係殊恩慶垂後裔  
舊例赴鎮後合納禮錢一千貫充中書及兩省公使伏  
自近年全隳往例今皇綱再振墜典咸修合舉成規異  
將集事臣等商量今請諸道藩鎮帶平章事處各納禮  
錢五百千中書建立石亭子一所鐫紀宰臣使相爵位  
姓名授上年月其所納錢請充中書修建公署及添置  
都堂內鋪陳什物勅從之

四年四月二十一日勅諸道節度使帶平章事兼侍中

中書令在京則中書差直省一員引接及赴鎮擬合追  
還緣使相在京百官請諸須差直省引接兼侍衛出入  
或恐朝列誤冲及到本道自有客司通引官引接其從  
榮從厚雖爲皇子職本侯王王建立孔循曾掌樞衡見  
居藩鎮况諸道使相無直省者甚多其列東青許州先  
將去直省並宜追還中書

清泰二年二月中書奏近日除官制書未下多已漏洩  
此後除改候畫下所司以正勅寫官告進納如畫黃未

下請不催素勅節度防禦團練使刺史行軍副使等事  
關急切除授官告若待畫下給賜即恐滯留勅樞密院  
凡經由處不得漏洩其尋常除命依中書所奏

門下侍郎

晉天福五年二月勅以門下侍郎爲清望正三品

七年二月勅門下侍郎班位宜在左右散騎常侍之下  
其俸給考限依左右散騎常侍例

中書侍郎

晉天福五年二月勅以中書侍郎為清望正三品

中書舍人

後唐清泰二年十一月勅中書舍人所撰誥詞當以其人揚歷功效分明訓獎以代王言

晉天福五年九月詔曰六典云中書舍人掌侍奉進奏參議表章凡詔旨制勅璽書策命皆按故事起草進畫既下則署而行之其禁有四一曰漏洩二曰稽緩三曰違失四曰忘誤所以重王命也古昔已來典實斯在爰

從近代別創新名今運屬興王事宜師古俾仍舊貫以  
耀前規其翰林學士院公事宜並歸中書舍人

開運元年六月詔依舊置翰林學士院其中書舍人公  
事准舊日施行

諫議大夫

晉天福五年二月以左右諫議大夫為清望正四品

周顯德五年六月勅諫議大夫宜依舊正五品上仍班

位在給事中之下

按唐典諫議大夫四員正五品上皆  
除門下首班在給事中之下至會昌



二年十二月，中書門下奏升為正四品，下仍分為左右。以構兩省四品之闕，故其班亦升在給事中之上。近朝自諫議大夫拜給事者，官雖序遷，位則降等。至是以其遷不倫，故改正之。

### 起居郎起居舍人

後唐天成四年十二月，尚書比部員外郎崔稅奏請自今後每遇起居令，左右史隨宰臣上殿，各齎紙筆分侍。冕旒或階下發一德音，宰臣陳一時政事，無大小皆

令編錄，季終即送史館。

左右史，古官也。唐朝改為起居，舊制每視朝即左右史兩員以

短卷牋紙執筆趨立於聽政殿之螭首下，或聞君之言，動美惡必書之。泊莊宗中，與月朔入朝，左右史夾香案。

對立但不持紙筆自後  
雖名其官故事皆廢

長興二年八月勅准故事應朝廷凡行制勅並宜令起居院抄錄關送史館

周廣順二年十一月詔逐月給紙五百幅付起居院

符寶郎

晉天福三年六月中書門下奏准勅製皇帝受命寶今按唐貞觀十六年太宗文皇帝刻之元璽白玉為螭首其文曰皇帝景命有德者昌勅宜以受天明命惟德允

昌為文刻之

周廣順三年二月內司製國寶兩坐詔太常具制度以  
聞有司奏按唐六典符寶即掌天子八寶其一曰神寶  
其二曰受命寶其神寶方六寸高四寸六分厚一寸七  
分螭龍紐文與傳國寶同傳國寶秦始皇帝以藍田玉  
刻之李斯篆文方四寸面文曰受命于天既壽永昌紐  
蟠五龍二寶歷代相傳以為神器又別有六寶一曰皇  
帝行璽二曰皇帝之璽三曰皇帝信璽四曰天子行璽

五曰天子之璽六曰天子信璽此六寶因文為名並白玉螭虎紐歷代相傳亡則補之北朝鑄之以金至則天朝以璽字涉嫌改之為寶貞觀十六年別製元璽一坐其文曰皇天景命有德者昌白玉螭虎紐同光中製寶一坐文曰皇帝受命之寶晉天福四年製寶一坐文曰皇帝神寶其同光天福二寶內司製造不見紐象并尺寸制度勅令製寶兩坐宜用白玉方六寸螭虎紐詔馮道書寶文其一以皇帝承天受命之寶為文其一以皇

帝神寶為文

按傳國寶自秦始皇後歷代傳受至唐末帝自煬之際以寶隨身焚馬晉高祖受命時

製寶一坐開運末北戎犯闕少帝遣其子延煦送于戎王戎王訝其非真少帝上表具述其事及戎王北歸齋以入蕃漢朝二帝未暇別製至是始創為之

### 城門郎

梁開平元年五月改城門郎為局郎至後唐同光元年十一月却改為城門郎

### 金鑾殿學士

梁開平三年正月改思政殿為金鑾殿至乾化元年五

月置大學士一員始命崇政院使敬翔為之

前朝因金鑿坡以為

門名與翰林院相接故為學士省稱金鑿以美之今以金鑿為名非典也大學士與三館大學士同

### 端明殿學士

後唐天成元年五月勅翰林學士尚書戶部侍郎知制

誥馮道翰林學士中書舍人趙鳳俱以本官充端明殿

學士非舊制也

上初登位以四方書奏多令樞密使安重誨讀之不曉文義于是孔循獻議因

唐室侍讀之號即創端明殿學士之名命馮道等為之

二年正月勅端明殿學士宜令班在翰林學士上今後

如有轉改祇于翰林學士內選任

初置端明殿學士名目如三館之制職在

官下及趙鳳轉侍郎遣人諷任園移職在官上至今為例

### 翰林院

梁開平三年十二月以前進士鄭致雍為翰林學士非常例也

後唐同光元年四月置護臺書制學士以尚書倉部員

外郎趙鳳為之

時莊宗初建號故時立此名非故事也

二年七月以侍省內給事楊彥珞充學士院使

其年八月賜翰林學士承旨戶部尚書盧質論思匡佐  
功臣非常例也

天成三年八月二十九日勅掌綸之任擢才以居或自  
初命而升或自顯秩而授蓋重厥職靡繫其官雖事任  
皆同而行綴或異誠由往日未有定制議官位則上下  
不常論職次則後先未當宜行顯命以正近班今後翰  
林學士入院並以先後為定惟承旨一員出自朕意不  
計官資先後在學士之上仍編入翰林志



其年十二月二日學士院記事樞密院近送到權知高麗國諸軍事王建表令賜詔書者其高麗國未曾有人使到闕院中並無彼國詔書式樣未審呼卿呼汝兼使何色紙書寫及封王事例伏請特賜叅酌詳定報院者中書帖太常禮院體析由堂據狀申謹按本朝太宗皇帝親平其國後不立嗣是以祇書新羅國請約賜新羅國王書詔體樣修寫奉勅賜高麗國書詔宜依賜新羅渤海兩藩書詔體樣修寫

長興元年三月翰林學士劉昫奏臣伏見本院舊例學士入院除中書舍人內不試餘官皆先試麻制答蕃批答各一道詩賦各一道號曰五題所試並於當日內了便具呈納從前雖有召試之名無考校之實每遇召試新學士日或有援者皆預出五題潛令宿構無援者旋令起草罕能成功去留皆係于梯媒得失盡歸于偏黨今後凡本院召試新學士欲請權停試詩賦祇試麻制答共三道仍請內賜題目兼定字數付本院召試從之

晉天福二年四月中書奏准翰林志凡赦書德音立后  
建儲行大誅討拜免三公宰相命將制書並使白麻紙  
不使印雙日起草候開門鑰入而後進呈至之日百寮  
立班于宣政殿樞密使引紫自東上閣門出若拜免宰  
相即便付通事舍人餘付中書門下並通事舍人宣示  
若機務急速亦使雙日甚速者雖休假亦追班宣示勸  
據翰林志言立后不言立妃言儲君不言親王公主兼  
三師位在三公之上文並不載今後立妃及拜免三師

三公宰相命將封親王公主並降制命餘從今式

其年十一月勅新除翰林學士張昭遠早踐綸闈久司  
史筆曾居憲府累陟貳卿今既擢在禁林所宜別宣班  
序其立位宜次崔稅

五年九月勅廢翰林學士院其公事並歸中書舍人

開運元年六月勅翰林學士與中書舍人舊分為兩制  
各置六員偶自近年權停內署況司詔命必在深嚴將  
使從宜却仍舊貫宜復置翰林學士院至三年正月賜

翰林學士院詔書金印一面

周顯德三年八月宣翰林學士院今後凡與諸侯王詔書除本名外其文詞內有與其名同者宜改避之

五年十一月詔曰翰林學士職係禁庭地居親近與班行而既異在朝請以宜殊起今後當直下直學士並宜令逐日起居其當直學士仍起晚朝

五代會要卷十三

欽定四庫全書

五代會要卷十四

宋 王溥 撰

尚書省

後唐天成元年七月二十七日尚書省准堂帖應內外帶職除官自三公至郎官合納禮錢送尚書省都司具舊例如左檢校師太尉舊例各合納錢四十千准蠲減外今各合納錢二十千檢校太傅太保舊例各納三十

千減外今納十五千檢校司徒司空舊例各納二十千  
減外今納錢一十千檢校僕射尚書舊例各納一十五  
千減外今納七千檢校郎中員外郎舊例各納錢一十  
千減外今納三千四百勅會府華資皇朝寵秩凡霑新  
命合納禮錢爰自近年全隳舊例方當提舉宜振規繩  
其間除翊衛勛庸藩垣將佐自軍功遷陟外其餘自不  
帶平章事節度使及防禦團練刺史諸道副使判官以  
下三司職掌監院官縣令錄事參軍判官等凡闕此例



並可徵納其檢校官自員外郎至左僕射祇取初轉一任納錢若未改呼不更徵納仍委尚書省都司逐月具數申中書門下

尚書令

梁開平三年三月升爲正一品

左右僕射

後唐天成二年八月中書門下奏據新授尚書左僕射李琪狀准舊例上事日合有恩賜百官酒食具載開元

禮文者尋下太常禮院檢開元禮祇有從太師已下至六部尚書太常卿太子詹事諸衛大將軍京兆河南牧上州刺史受冊拜廟各就本司禮上無中書門下送上文亦無恩賜酒食之事又檢禮閣新儀並不載諸品大臣上事禮例唯僕射初上見羣寮輕重之禮惟元和六年御史中丞竇易直奏七年尚書左丞段平仲奏太和四年中書奏覆下太常禮院並尚書省詳議終未能定大凡禮上爲領本司公事及與官寮相會並受人吏

叅賀內外無異前後皆同李琪尋會羣僚不稱新授已領公事已請料錢更引上儀即非通制今請李琪任便赴省發遣公事今後文武兩班受恩命者不計高卑未領事不得擅落新授字及便請料錢內廷學士中書舍人不在此限從之

長興四年十一月新授尚書右僕射盧質奏臣忝除官合赴省上若准舊例左右僕射上事儀注所費極多欲從權務簡祇取尚書丞郎上事例止集南省屬僚及兩

省官送上亦不敢輒援往例有費官中自量力排比兼不敢自臣隳廢舊規他時任行舊制從之

左右丞

梁開平二年四月改爲左右侍郎

避廟諱也至後唐同光元年十一月復舊爲左右丞

後唐長興元年九月升尚書右丞官品與尚書左丞並爲正四品

吏部

後唐同光二年正月中書門下奏准本朝故事如封建

諸王內命婦及宰相翰林學士中書舍人諸道節度觀察團練防禦留後即中書帖吏部官告院索綾紙標軸下所司修寫印署畢進入內宣賜其文武兩班並諸道官員及奏薦將校勅下後並合呈本道進奏院或本人自於所司送納朱膠綾紙價錢各請出給今後請除內司大官並侍衛及賞軍功將校轉官外並請官中不給告勅從之

三年正月勅吏部今後特恩授官侍衛軍功改轉內庭

諸司帶職外來進奏受官綾紙並宜官給舊例朱膠一切停廢禮錢亦不徵取又慮所司人吏不辦食直糧課逐月兩司各支錢四十千至於臺省禮錢宜特蠲減比舊數五分許徵一分其特恩已下不得徵納禮錢仍令中書門下條流勅畫經過諸司不得停滯其官告若是宣旨除授及品秩合進呈者准例進內餘並送納中書門下勘檢給付勅畫到本司十道已上官告限三日內即署三十通已上限五日五十通已上中書門下與限

催促如臨時緩急宣賜不拘此限

天成元年七月中書奏近奉宣旨使府判官州縣官告身勅牒今後據通數進納仍令祇候宣賜者舊例朝廷命官除將相外並不宣賜官告因僞朝條流凡准宣授官即特恩頒賜今使府判官皆許本道奏請或聞多在京師至於令錄悉是放勅後本官自於吏部出給告赤中書不便管係臣等商量自兩使判官州縣令錄在京除授即望令於內殿謝官便辭赴任不更進納官告其判司主

簿不合更許朝對勅下後望准舊例處分從之

二年四月二十四日勅兵吏部應出給書寫印署官告其本曹郎中令自今後於本官幕次當直候知印宰相當制舍人出後即歸人吏並勒隨本官祇候仍下度支逐日量破食料其本行尚書侍郎左右丞等每日赴朝遇行勅旋即印署發遣免至公事淹延

三年十一月吏部奏流外官今後祇考年勞乞不試判從之



四年十一月勅今後應是官告除准宣破外其陳乞除官並追封追贈叙封進封官告及舉人各集綾紙羅標軸錦袋等宜令並與官破仍勒各隨色樣尺寸如法裝修疾速書寫印署進納

其月勅應諸道州府令錄等官告勅牒元是中書進納入內令閤門宣賜其判司主簿官告舊是所司發遣受恩後令赴本任地理遠近各有程限比候進納恐有停滯况綾紙標軸價錢近已官破今後所除州縣官告身

勅牒宜令中書門下指揮不要進納並委宰臣當面給付

長興二年閏五月十九日吏部狀奏當司制勅甲庫專知官一例近停廢者伏緣當司主掌制勅甲庫與三庫不同常日檢尋諸司取證稍有差謬所失非輕無人主持必虞敗闕今欲於吏部令史內選差一員勾當又緣公事至重仍遣別不執行他事兼乞除本役外特與減二年勞考者奉勅宜依其中書省門下省兵部甲庫公

事亦准此

司封

後唐同光二年九月二十八日奏當司奉今年三月二十八日勅内外文武官母妻可據品秩高卑封邑號者當司檢會舊起請叙封條貫如後

一准舊條應内外文武及致仕官母妻叙封進封邑號者或遇特勅別加獎封外其餘官據官階齊五品母爲縣太君妻爲縣君官階齊四品進封母爲郡太君妻爲

郡君官階齊三品母進封爲郡太夫人妻爲郡夫人如未經封邑雖位至三品亦以從初而叙近年多於所司陳狀便請依官品叙封既非特勅恐失舊規其所謂准例封並請依格條施行

一准舊例應外任其上州刺史或帶使額抑督府在京諸軍衛將軍小將軍已上初任聽准例各與母妻依品第叙封其東宮雜五品初任升朝並中下州刺史並許至第二任叙封如自班行及遙郡除授中下州刺史者

已同兩郡許聽叙其他並請准例

一諸道節度副使節察兩使判官先准起請節文如曾任五品已上升朝官聽叙封緣帶使職不合與諸色帶職官同列自今後如全未經封者許與母妻一度封叙邑號仍須官階合格如更除授歸班官領郡符即許進封如守職就如官階不在進封之限今又伏見諸道有奏置行軍司馬並叅謀者其職位實在副倅之上自此是曾任升朝官並刺史者亦請節度副使兩使判官例

處分

一前資官請與母妻封進邑號或多積歲或曾經殿累  
停替皆妄有申請當司請各立年限其邑號得替後一  
年內聽叙一年外並殿累未改頭銜並不在申請之  
限

一應諸色官請與母妻叙封邑號者竊緣先有文武官  
授官勅申並先封邑號勅申累經散失無憑檢詳近者  
多是身在他處守官於所司投下公狀則削去見在頭

銜却稱前任官品若當司便與申奏則勅下後所給告牒年月不同自此請准前後起請節文如省司失墜勅申者京官引驗本官告身勅牒及母妻前封邑號告身勅牒如因失墜即磨勘歷任如官序顯著叅詳並封不虛即取登朝官三員充保仍須結罪使印方與進封如是曾任節度觀察團練經畧防禦刺史等則責本道進奏知後院狀入案刺史無知後院即取使府進奏官狀並准京官例取登朝官三員充保其五府少尹左右司

馬外道帶職官等若自班行除授即准京官例檢勘若  
自本道奏薦即准節度使已下至刺史取進奏官狀詳  
驗如無保狀具歷任經堂陳述候裁下點檢訖即却勒  
從初封叙如進擬後再勘及有人糾告稱官階及前封  
邑號謬妄並在官雜帶職官違碍條格亦自落職名請  
叙封者其本官具名銜申奏其陳狀勾當人申堂取裁  
其諸色官並各守條限指揮其勾當人如與外州府刺  
史諸色官勾當者即須係外州府職名其所通狀仍須具



鄉貫兼取本道進奏官連署識認使本道進奏院印方可施行如是京官下勾當人不係見任前資並須是本任官司局人吏勾當仍於狀內分明豎出某司印兼委本行令史署保如違格條不在施行之限

一應升朝並諸州刺史左右司馬五府少尹凡與母妻封邑號事其中或有進奏官勾當人纔勅下便經省陳乞封叙當司若便施行又慮却有追改稍或逗撓即緣恩命已行官階合格前後起請節文未曾條制自今後京官或身在

京除授外官者並在外除授或帶職或諸道奏薦受官階品職銜合格者不係四品五品已上候印給告身畢日將至當司引驗方許據狀封叙

一應諸色官階合格後却授陵臺令州縣官或帶諸雜散職或授場監職銜有碍格條者却即引前任階銜論若一例施行恐紊條式自此後須待再授官階相當即許叙使不在以見任不合格例官銜請論進擬之限

一准舊例應諸衛小將軍上中下等州刺史都督使額

母妻封至郡君若止檢校官或階爵至三品亦不在論  
請進封之限如是防禦團練經畧等使已上階至三品  
許至郡夫人郡太夫人其餘諸色官並請各循元格階

品

一准舊條應外任除五府少尹諸州刺史封叙外其左  
右司馬與長史別駕一例釐草不許封叙自後諸道論  
請不絕今勘會大都督左右司馬與五府少尹資序不  
殊自今後請准五府少尹例特許叙封仍須檢勘出身

不得正條方與聞奏餘並依元起請條流

一准往例諸道上州司馬陵臺令率府諸衛郎將中郎將司天  
五官正雖是五品並不在封叙之限其大理正先有起  
請不許緣是次對官即與五正不同今請同諸五品例  
施行

一諸色官請與母妻進封邑號准舊例若遇改官加階  
爵或加檢校官者勒勾當人於狀內豎出所加官轉階  
年月當司檢勘不虛即與進封如不遇改官轉階不在

進封之限

一文武官封王爵邑加實封准舊例合司封印給勅牒  
告身自離亂已來兵吏部多錯誤印給若是因檢校官  
加階或因除正官便封爵邑加實封者便以文爲首即  
合兵吏部印給如迴封爵邑實封或封王事在司封印  
給請准例處分

一文武常朝官初請與母妻封邑經都省發狀後當司  
驗本官告身勅牒伏緣近日多不便出告身遂致無憑

引証自此除當司檢兵吏部申庫勘授官年月日勅頭外請許通納前任告身或兩司料錢厯子分明不虛并子案牒送門下省許驗申奏

一當司所給公王封爵承襲告身如帶同中書門下使色背金花綾紙如節察不帶使相者白背金花綾羅紙已下諸官並使白綾紙其追封并邑號則不係品位高卑並使色背金花羅紙其紙面除內出翰林修寫告身外不得輒畫龍鳳又除堂封送到書及國夫人已下叙

封告身外當司所給諸色官員告牒焚黃等諸選定書  
寫吏人并所供綾羅紙三人各錄姓名入案及給牒知  
使省號印子為驗責免叅雜勅宜依

長興二年十月勅在朝臣寮及藩侯郡守據禮例合追  
贈者新授命後便於所司投狀旋與施行自中興以來  
外官曾任朝班據在朝時品秩格例合得封贈叙封未  
霑恩命者並與施行

其叙封妻室品廕子孫仍令所司一一具格式申奏其

或應得而不與應不得而與之罪在所司

晉天福二年四月中書門下奏准二月二十六日勅內  
外臣寮亡父母祖父母據品秩未封贈者與封贈已封  
贈三代更加恩命按舊制一品官亡父已上三代約其  
子官品約降一等亡母追封國號祖母已上第降一等  
勅其內外准勅合與三代已下封贈者並以現居官品  
比擬不得第降付中書門下准此

其年十二月勅應內外文武臣寮父母在如子品秩及



格各與加恩若在朝列者父與致仕官母與叙封郡邑  
號其外四品已上節度團練防禦使刺史父與致仕官  
其餘與同正官母與叙封郡邑封如內外官父已有致  
仕官及同正官母已曾叙封子品高者更與加進如父  
有職官者不在此限餘准格文處分

漢天福十二年九月尚書司封奏當司合行事件如後  
皇太后三代祖母並追封國太夫人皇太子三代外祖  
母宗室郡國王曾亡母亦追封國太夫人中書門下二

品及平章事在朝正一品官使相曾祖母祖母亡並追封國太夫人如母在叙母為國太夫人妻為國夫人上

並在中  
書施行

東宮一品尚書省二品不帶平章事留守節度使祖母並許追封郡太夫人止如母在叙封母為郡太夫人妻為郡夫人止如曾任皇朝將相已經追封三代祖父母及已封國太夫人者依舊施行

東宮二品西班二品尚書省三品御史大夫中書門下

侍郎太常卿亡母並追封郡太夫人止如母在叙封為  
郡太夫人妻為夫人止如任皇朝將相已經追封三代  
兩代祖父母及已封國太夫人者依舊施行

母

應致仕官如未致仕日曾任五品以上正官原闕封者與據品秩  
施行嫡母正室即許封叙如非嫡及正室不在論請封叙之限  
應諸色官請與母妻叙封須候官階齊即得如官及所封  
官階並許施行勅從之

乾祐元年二月二十九日勅應文武內外官員有父母見在合得加恩叙封者不在官階品齊但見居官品合與父加恩母叙封進封者便與施行餘准前勅

其年七月三日尚書省奏准敕書節文在朝文武臣僚父母在者並與追封內有父在見任官母合叙封否中書帖吏部廢置司令具新舊勅例父在見守官得承子廢加恩及父在母叙封追封合加太字事例申上吏部廢置司以前後格勅內祇言父母許與加恩即不說父

在見守官及前任得承子廕加恩例司封以檢詳前後  
勅例凡母皆加太字存沒並同即不說父在不加太字  
近例有中書舍人艾穎於天福五年十二月任殿中侍  
御史父在繼母李封縣君不加太字尚書司門郎中尹  
拙天福八年三月任尚書倉部員外郎父在母宋封縣  
君不加太字奉勅應內外臣寮如父准恩勅合承子廕  
加恩者父未曾有官即量與致仕官見任亦自該恩赦  
又難用子廕如已去任願授致仕官者亦可施行即不

得就加恩命其父在母承子廕叙封追封合加太字與不合加雖有艾穎尹拙近例恐是一時特恩別無勅例宜令尚書省集議奏聞永為常式尚書省奏議曰臣等詳本司前後勅條凡母皆加太字存沒並同此即是父沒母存即叙封追封內加太字母沒追封亦加太字故云存沒並同若是父在據勅格不載為母加太字之文若以近勅因子貴與父命官父自有官即妻從夫品可以封妻父在不合以其子廕加母太字若雖有因子之

官其品尚卑未得廕妻叙封亦不合用子廕之限從之

司勳

後唐天成三年五月十九日勅近代已來文武官階稍  
高便授柱國歲月未深便轉上柱國武資初官便授上  
柱國官爵非無次第階勳備有等差宜自此時重循舊  
制今後加勳先自武騎尉經十二轉仍永為常式

清泰元年八月尚書司勳郎李盈休奏近日朝廷凡初  
叙勳便至柱國臣伏見本朝位至宰輔藩鎮其勳皆從

初叙蓋欲承人揚歷功用之重也勛格自武騎尉七品至柱國正二品凡十二轉令從羣官得叙封者並請自武騎尉依次從之

五代會要卷十四



欽定四庫全書

五代會要卷十五

宋 王溥 撰

考功

後唐天成元年十月三日尚書考功條奏格例如後一  
准考功令諸司外文武官九品已上每年當司長官考  
其屬官應考者皆具錄一年功過行能議其優劣定九  
等考第京官九月三十日已前校定外官去京一千五



百里內八月三十日已前校定三千里內七月三十日  
已前校定五千里五月三十日已前校定七千里內三  
月三十日已前校定萬里內正月三十日已前校定本  
州定訖京官十一月一日送簿外官朝集使送簿限十  
月二十五日已前到京考後功過並入來年無長官次  
官考縣已下及闕鎮庶官嶽瀆令並州考津非隸監者  
亦州考

一准考課令諸每年考簿集日考司校勘訖別為簿具

言功過京官三品已上及同中書門下三品並平章事  
奏裁親王及五大都督府六同四品以下及餘外官並  
使人量定聞奏單數仍備狀進中考並單名錄奏

一准考課令諸每年尚書省諸司府州牧刺史縣令政  
有殊功異行及祥瑞災蝗戶口賦役增減當界豐儉盜  
賊多少並錄考司

一准考課令諸官人治績功過應附考者皆須實錄其  
前任有犯私罪斷在今任者同見任法即改任應計前

任日為考者功過並附其狀不得過兩紙州縣長官須  
言戶口田宅者不得過三紙註考証之最一最已上有  
四善為上上一最已上有三善或無最而有四善為上  
中一最以上有二善或無最而有三善為上下一最已  
上有一善或無最而有二善為中上一最已上或無最  
而有一善為中中職事粗理善最不聞為中下受憎任  
情處斷乖理為下上背公向私職務廢闕為下中居官  
諂詐及貪濁有狀之類為下下若於善最之外別有可

嘉及罪雖成殿而情狀可矜或雖不成殿而情狀可責者省校之日皆聽考官臨時詳定

一准考課令諸官人因加戶口及勸課田農并緣餘功進考者於後事若不實縱經恩赦皆從追改

一准式校京官考限來年正月内外官考限二月内者所司至三月内申奏了畢伏以書校内外官考課逐年申送考簿各有程期近年已來諸道州府及在京諸司所送考解多是稽違自今後所申考簿如違格限二十日不

到其本判官并錄事參軍伏請各罰一百直本典勾官請委本道科責如違一月日已上不申到本判官伏請罰二百直錄事參軍量殿一選本直勾官請委本道重加懲斷在京諸司如違格限不關牒到者其本司人吏牒報御史臺請行追勘

一准格應所闕縣令計日成四考餘官計日成三考闕今後州縣官等並許終三十个月成三考自上官後至年終但滿一百八十日便與頭考次二年即須兩考滿

足如頭考滿足第二考全足即許計日成末考方與三十個月事理合同如過月限無替人到准上條處分者伏以每年書校官員考課格限則顯有舊條授上則雖為定制但以每月之內皆有除移今准格且以六月內上為準

一應申校內外六品已下赴選官員考課准格自上任後但滿一百八十日便與成頭考年終非書考時須至來年准格書校時併申兩考如六月已前直至正月到

任者自上任日至校考時頭考日足即考後功過並入來  
年如至書校時頭考欠日未成資考亦至來年准格書  
校時併申兩考如六月以後至年終上者並至准格日  
收計一考有剩日不在重使之限一應經考後合收次  
年以一周歲為限如未滿一年停替者但及三百四十  
日與成如欠日不在收計之限

一應收未考但經考後去任時得及二百日與成如欠  
日不在收計之限如過月限無替人並准上條處分



一應申校內外官員赴選考課頭須具經考已後課績不得重疊計功其末考須具得替年月日比類升降

一應申校內外六品已下官員考第以去京地里遠近逐年書校申送考解各有程期今後應內外赴選官員考第既准格依限逐年比校即不合更將州府及本司考牒為據其有已前罷任官員不計年限考第未經省校者如有州府及本司考詞考牒全備者欲據在任年月日檢勘省司給與牒知如在任之時州府及本司向

來元不曾書校給牒祇於解由歷子內批出考數者欲與檢勘解日歷子內不豎過犯稱在任日並無公事遺闕証驗分明亦據在官年月日給與牒知如檢勘無憑者不在給牒之限其今年各准格赴集選人便合請給省校考牒直至南曹受納告赤已前並許經所司投狀檢勘出給其考牒又准格須奏下當年內出給如隔年者不在行使之限如或實有事故次年內請給自今後當年奏下校考許至來年內請給如更違格限請一年

與殿一選如至三年外不請給者所司不在出給之限  
其已前校奏下內外赴選官員考課其間有未曾請給  
考牒者並合投狀請給以備選曹磨勘如將來選人今  
在考第依前固違格條不經省司勘校給牒及已曾奏  
較下勅考不請給考牒者南曹不在檢勘判成之限  
一應申投內外官員考課文解須依格限到省如申發  
後其間或有非時事故停任所司無以得知請委本判  
官並錄事參軍專切提舉事由申省以憑點校錄奏

一准故事校考舊條內外官員並校考之時諸道差朝集使應內考即差中書舍人給事中監考伏自校勘不行往例全廢自今後省校之時伏請中書門下選差清望官兩員監校外外官員考課便同點校申奏其合經由中書門下兩省准例各供宣黃清守舊規以為永制一應申校外外官寮考課如有過犯便降書下考如在任之日於常課之外別有異績可稱比之上下考如諸道州府及在京諸司固違格例不具錄在任事績功過

依限比較申牒到省其本判官并錄事參軍及在京諸司並請准前殿罰

一應諸司諸流外職掌人等准令本司量其行能功過立四等考第而勉進之今伏請准新定格內條件內逐年依限投狀各具在職功過書校考第檢勘錄奏

一應諸司令史及勒留官丁憂不計有官無官並一百日後舉送如願終喪不在舉限除丁憂年一考不附奏次年便許計選數赴集其丁憂人仍牒考功及南曹終

喪者計三年憂一諸色選人使上考減選其下考並合殿選并注令錄銓曹勘驗祇憑考功報檢多有差錯令請每年考功申校上考及下考勅下後請具單名牒門下省及申三銓關報南曹以憑勘會並須九月以前報畢從之

清泰二年五月尚書考功奏奉去年五月勅中外官員宰臣節度使已下並逐年書考僅千餘員當司人吏貧乏乞依三銓例當司歸司官逐月支賜紙筆糧錢勅考

功司人吏依三銓例給與糧錢春冬衣賜諸司不得援例從之

周廣順二年十二月二十八日勅節文其省校考牒如是奏下後滿三年不請給考牒者宜令考功准先降勅文不在出給之限

三年三月十四日勅節文起今後諸州府更有功中考簿違格限申到者本判官並錄事參軍各罰五十直其錄事參軍仍殿一選本句押官典委本州各行科斷如

違限一月已上不申到者仍令尚書考功催促候供申到考帳依例施行所有科罰准前處分若是校考過時即與次年依格奏校又勅州縣官或特勅除授或非時省故員闕除官到任者緣赴任不拘期限申發考帳之時但滿一周年便與依例書校一考中省如書校時少欠月日即與次年附帳申校不得滿落考第姓名如或有違罪本道書考官吏

顯德五年閏七月尚書考功奏奉新勅起今年正月一



日後授官並以三周年為限閏月不在其內著當司所  
書校內外六品以下赴選官員考第今後以一周年校  
成一考如次日不計限滿三周年校成三考如考滿後  
未有替人在任更一周年與成第四考欠日不在計限  
兼逐年月日自上已來課績功過第二考須具經考後  
課績不在重疊計功其末考須是具得替年月日比期  
降自今年正月一日已前授官到任者准格例三十個  
月書校三考今年正月一日後來授官到任者准新勅

三周年為限每一周年書校一考閏月不在其內所  
有諸道州府校考申發考帳及當司校奏各依前後格  
勅施行

應諸司諸色流外出身人等准格並須待附甲下然後  
與申考近年不經奏考便至參選頗啓倖門應在司見  
投人等自今後逐年起六月一日後正身於所司投狀  
請申校勞考省司具狀却牒本司勘會補奏年月日勅  
甲頭姓名見主掌案分公事牒報省司將元狀檢勘同

即與准例申校仍自此後須逐年九月以前校奏了畢不在更與隔年併書之限其考牒本無紙書寫勅例今後每年奏下逐人給省牒一紙使大張紙書及併年都給限據省校勘勅下考牒方許計考如書校之日有公事在外差出即本司雜事須具在職功過及出外事由牒報考功不得有妨逐年考校如不與申牒其雜事令史量情科決罰殿一選如無故自不經省投狀請奏校不在論訴之限者當司緣勅勅促期限慮恐校考遲違

今後應合校考人請起自五月一日投狀限十日畢至七月三十日已前校奏餘依元格施行從之

兵部

後唐同光二年五月二十五日尚書兵部奏重制置收補千牛進馬事如後

一進馬准舊例八員殿中省進馬四員太僕寺進馬四員千牛一十二左仗六員右仗六員准例取十三已上收補十五已上出仗各守三十五月限

一准六典千牛備身及太子千牛皆取三品已上諸司  
官四品清官子孫儀容端正武藝可稱者補充令請使  
二品三品四品清官蔭補左右僕射太子少師少傅少  
保御史大夫六行尚書左右常侍門下侍郎中書侍郎  
太子賓客太常卿宗正卿左右丞諸行侍郎秘書監國  
子祭酒節度統軍上將軍金吾大將軍已上並許補子  
為太子千牛諸使東宮三品四品清官蔭補詹事庶子  
請使北省二品南省一品正官蔭補侍中中書令太師

太傅太保太尉司徒司空太子太師太子太傅太子太保已上並許補孫

一見任兵部尚書侍郎並不得收補子孫凡請使廕一官祇許考一員二十年二品三品四品不得過十年如過年限所司不在收補若是身有殘疾不在收補之限一准舊例每入閣皆須赴仗祇候如三度不到便除落名姓

一應所請補千牛進馬先具廕序品第於都省投狀俟

都發狀到當司即引過本行尚書侍郎郎中員外郎點  
檢年貌及勘會廕序引問習試合格方得收補呈引過  
堂候過堂了始可申奏餘請准格施行從之

晉天福五年三月勅兵部禮部引人過堂之日幕次酒  
食會客悉宜停廢

### 職方

後唐天成三年閏八月勅諸道州府每於閏年合送圖  
經地圖今後權罷

長興三年五月二十三日尚書吏部侍郎王權奏伏見  
諸道州府每遇閏年准例送尚書省職方地圖者頃因  
多事之後諸道州府舊本雖存其間郡邑或遷館遞曾  
改添增鎮戍初造城池竊恐尚以舊規錄為正本未專  
詳勘必有差殊伏請頒下諸州其所送職方地圖各令  
按目下郡縣鎮戍城池水陸道路或經新舊移易者並  
須載之於圖其有山嶺溪湖步騎舟楫各得便於登涉  
者亦須備載奉勅宜令諸道州府據所管州縣先各進



圖經一本並須點勘文字勿令差悞所有裝寫工價並以州縣雜罰錢充子得配率人戶其間或有古今事迹地里山川土地所宜風俗所尚皆須備載不得漏畧限至年終進納其畫圖候紙到圖經別勅處分

戶部

後唐天成三年閏八月廢戶部蠲紙四年五月尚書戶部狀申伏緣當司蠲符近奉勅令有事功可著者即戶部奏聞又不開逐年及第進士及諸科舉人事例今據

前進士趙彖乞蠲符者奉勅凡登科第皆充差徭如  
或雷同慮傷風化兼緣近有勅命不合更乞蠲符所  
宜特示明規務在勸人為學除新勅前已給蠲符外  
應禮部貢院每年諸道及第人等宜令逐道審驗春  
闈冬集不得一例差徭其及第人亦不得虛影占戶  
名

長興二年九月二日勅凡置營田必召浮客若取編戶  
實案常規如有繫稅之人宜令却還本縣供應三

京諸道管田祇耕佃無主荒田禁召浮客此後若敢違  
越某官吏及投名稅戶當行重斷

三年五月二十九日尚書戶部奏當司所管天下  
合貢方物於長興三年三月定到七十餘州舊例  
冬至後齊到正仗前點檢至元日殿前排列當司  
引進昨點檢今年正仗前內六十七州至其餘二十  
州自正月至三月方到京師其江陵府所貢胎白魚  
勘問本道進奏官狀稱每年臘月浥造至正仗未堪供

進其餘州府未曾嚴加告諭請行勅命約束如來年正  
仗前貢物不齊其本州官典量定殿罰又棣州合進蘿磨  
子本州稱無本色折進價錢絹一疋任土作貢豈合折  
錢其絹價停勅江陵府胎白魚許於限內伏進餘依奏  
應順元年正月勅諸州府籍沒田宅並屬戶部除賜功  
臣外禁請射

晉天福四年閏七月尚書戶部奏李自倫義居六世准  
勅旌表門閭當司元無令式祇先有登州義門王仲昭

六代同居其旌表有廳事步欄前列屏樹烏頭正門闕  
闊一丈二尺一柱相去一丈柱頭安瓦桶黑漆號烏頭  
築雙闕一丈柱烏頭之南三丈七尺夾街十有五步槐  
柳成列今舉此為例又不載令文勅王仲昭正廳烏頭  
門等事既非故實恐紊彝章宜從令式祇表門閭於李  
自倫所居之前量地之宜高其外門安綽楔門外左右  
各建一臺高一丈二尺廣狹方正稱臺之形巧以白泥  
四隅染赤行列樹植隨其事力同籍課役一准令文

周廣順三年正月勅應諸處戶部管田人戶租稅課利除京兆府莊宅務贍國軍權鹽人戶兩京行從莊外其餘並割屬州縣所征租稅課利官中祇管戶部管田舊徵課額其戶部管田職員一切停廢

一應有客戶元佃繫省莊田桑土舍宇使令充為永業自立戶名仍其元佃桑土舍宇牛具動用實數經縣陳狀縣司給與憑由仍放戶下三年差遣若不願立戶名許召主卸佃不得有失元額租課其車牛動用屋舍樹

木亦各宜賜官中更不管繫

一諸處營田戶部院及繫賜人戶所納租牛課利其牛每頭具工率納苗課逐年都納夏秋斛斗二萬一千餘石更納錢鞋布稗草等其租牛緣官中繫帳不管死損歲月既深轉益貧困所徵牛租起今年後並與除放所有見在牛犢並賜本戶官中永不收繫

一諸州鎮郭下及草市見管屬省店宅水磴委本處常切管向其徵納課利不得虧失若有人收買具見值價

例申省仍仰本戶承認元本稅錢如是元本稅錢重大  
即減價出賣如無稅錢亦仰量事出稅管認輸納其空  
閒倒塌店宅及空地亦准此指揮所有貨賣宅舍仍先  
問見居人若不買次問四鄰不買方許衆人收買其元  
隨宅舍諸班物色亦仰隨本物業貨賣其兩京城內及  
草市屋宅店舍不在此例宜令諸道州府准此

其年九月勅京兆府耀州莊宅三白渠使所管莊宅宜  
並屬州縣其本務職員節級一切停廢除見管水碓及



州縣鎮郭下店宅外應有繫官桑土屋宇園林車牛動  
用並賜見佃人充本業如已有莊田自來被本務或形  
勢影占令出課利者並勅見佃人為主依例納租條例  
未盡委三司區分仍差尚書刑部員外郎曹匪躬專往  
點檢割屬州縣

度支

周顯德五年閏七月度支奏當司漕運水陸行程制陸  
行馬日七千里步及驢五十里車三十里水行泝流舟

之重者汴河日三十里江四十里餘水五十里空舟汴  
河日四十里江五十里餘水六十里沿流之舟輕重同  
制河日一百五十里江一百里餘水七十里其三峽  
砥柱之類不拘此限若遇風水淺不得行者聽折半功  
河南河北河東關內等四道諸州運租庸雜物等脚每  
駄一百斤一百里一百文山阪處一百二十文車載一  
千斤九百文從黃河及潞河自幽州運至平州每十斤  
泝流十六文沿流六文餘水泝流十五文沿流五文從

澧荆等州至揚州四文其山阪險難驢少處每馱不得過一百五十文平易處不下八十文有人員處兩人分一馱其運向播默等及涉海各在本處量定

延資庫使

梁開平三年九月以門下侍郎平章事薛貽矩兼延資庫使

至乾化二年八月以門下侍郎平章事于兢兼延資庫使

五代會要卷十五